



SOALAN LAZIM (FAQ)
BERKAITAN PENGURUSAN PEMBUKAAN SEMULA SEKOLAH
KEMENTERIAN PENDIDIKAN MALAYSIA DALAM
FASA PELAN PEMULIHAN NEGARA (PPN)

A. PEMBUKAAN SEMULA SEKOLAH

1. Bilakah sekolah akan mula dibuka?

Sekolah dalam negeri Fasa 2, Fasa 3 dan Fasa 4 PPN dibuka mulai 3 Oktober 2021 (negeri Kumpulan A) dan 4 Oktober 2021 (negeri Kumpulan B). Walau bagaimanapun, bagi sekolah di negeri Kedah yang berada di Fasa 1 PPN, murid Tingkatan 6 Semester 2 dan *International General Certificate of Secondary Education (IGCSE) O-Level* akan hadir ke sekolah tanpa penggiliran pada 10 Oktober 2021.

2. Adakah semua murid akan hadir apabila sekolah dibuka semula?

Tidak. Kehadiran murid ditentukan mengikut fasa.

3. Bagaimanakah kaedah kehadiran murid dilaksanakan?

Kaedah kehadiran murid adalah seperti berikut:

- a. Murid hadir ke sekolah tanpa penggiliran; dan
- b. Murid hadir ke sekolah bergilir secara mingguan. Kehadiran dihadkan kepada 50 peratus daripada jumlah keseluruhan murid dalam setiap kelas.

4. Adakah semua murid perlu divaksin dahulu sebelum hadir ke sekolah?

Tidak.

5. Adakah kaedah kehadiran secara penggiliran ini akan dilaksanakan sehingga Februari tahun 2022?

KPM akan memaklumkan sebarang perubahan berkaitan dengan kehadiran murid ke sekolah dari semasa ke semasa.

6. Adakah kelas yang mempunyai bilangan murid yang sedikit masih perlu digilirkan?

Ya.

7. Adakah ibu bapa/penjaga boleh memilih untuk tidak menghantar anak/anak jagaan ke sekolah atas sebab keselamatan?

Ya. Ibu bapa/penjaga perlu mengemukakan surat pemakluman ketidakhadiran anak/anak jagaan kepada pihak sekolah bagi tujuan rekod. Ketidakhadiran tersebut tidak akan dianggap sebagai satu kesalahan disiplin.

8. Adakah murid perlu sentiasa memakai pelitup muka dalam kawasan sekolah apabila sekolah dibuka semula?

Murid wajib memakai pelitup muka sepanjang tempoh mereka berada dalam kawasan sekolah. Pemakaian pelitup muka berganda digalakkan.

9. Adakah murid dibenarkan memakai pakaian selain daripada pakaian seragam sekolah?

Ya. Murid dibenarkan memakai pakaian yang sesuai, kemas dan sopan sekiranya pakaian seragam sekolah yang ada tidak lagi sesuai dipakai.

10. Adakah semua guru perlu hadir apabila sekolah dibuka semula?

Kehadiran guru adalah mengikut kehadiran murid bagi kelas yang diajar.

Contoh A: Cikgu Ai Leen hanya mengajar murid Tahap 1 yang hadir ke sekolah secara penggiliran. Oleh itu, Cikgu Ai Leen perlu hadir ke sekolah dan melaksanakan Pengajaran dan Pembelajaran (PdP) secara bersemuka.

Contoh B: Cikgu Bala hanya mengajar murid Tahap 2 yang mengikuti PdPR. Oleh itu, Cikgu Bala akan melaksanakan PdPR dari rumah.

Contoh C: Cikgu Aisyah mengajar murid Tahap 1 yang hadir ke sekolah secara penggiliran dan murid Tahap 2 yang mengikuti PdPR. Oleh itu, Cikgu Aisyah akan berada di sekolah untuk melaksanakan PdP secara bersemuka dan PdPR. Pelaksanaan

PdPR adalah berdasarkan Manual Pengajaran dan Pembelajaran di Rumah Versi 2.

11. Adakah guru yang menghadapi masalah capaian internet boleh hadir ke sekolah untuk melaksanakan PdPR?

Ya, dengan kebenaran ketua jabatan dan mematuhi prosedur operasi standard (SOP) yang ditetapkan.

12. Adakah Guru Bimbingan Dan Kaunseling/kaunselor perlu hadir apabila sekolah dibuka semula?

Ya, bagi sekolah yang melaksanakan PdP secara bersemuka.

13. Adakah semua Anggota Kumpulan Pelaksana (AKP) perlu hadir bertugas apabila sekolah dibuka semula?

Ya, kehadiran adalah berdasarkan peratus kehadiran maksimum mengikut fasa-fasa peralihan PPN. Pentadbir perlu merancang jadual kehadiran bertugas secara bergilir bagi pihak AKP berpandukan Garis Panduan Pengoperasian Pejabat Jabatan Perkhidmatan Awam Bagi Tempoh Kawalan Pergerakan (Kemas kini 23 Julai 2021).

14. Adakah ketetapan pengoperasian sekolah ini terpakai kepada semua sekolah kerajaan, sekolah bantuan kerajaan, dan institusi pendidikan swasta yang berdaftar dengan KPM?

Ya.

15. Adakah guru dan kakitangan sekolah yang telah menerima vaksin lengkap perlu menjalani ujian saringan COVID-19 sebelum hadir ke sekolah?

Tidak.

16. Adakah guru yang belum menerima vaksin lengkap atau belum divaksin perlu hadir ke sekolah?

Ya. Tetapi tidak dibenarkan melaksanakan PdP secara bersemuka. Guru ini akan ditempatkan dalam bilik yang berasingan dan mestilah sentiasa memakai pelitup muka berganda serta pelindung muka dengan mematuhi SOP khusus yang disediakan.

17. Adakah guru yang belum menerima vaksin lengkap atau belum divaksin boleh melaksanakan PdP secara bersemuka?

Tidak. Mereka akan melaksanakan tugas yang ditetapkan oleh KPM dengan mematuhi SOP khusus yang disediakan.

18. Adakah Anggota Kumpulan Pelaksana (AKP) yang belum menerima vaksin lengkap atau belum divaksin dikehendaki hadir bertugas?

Ya. Mereka akan melaksanakan tugas yang ditetapkan oleh KPM dengan mematuhi SOP khusus yang disediakan.

19. Adakah pekerja perkhidmatan sokongan yang belum menerima vaksin lengkap atau belum divaksin dibenarkan hadir bertugas?

Tidak. Hanya pekerja yang menerima vaksin lengkap dibenarkan hadir bertugas.

20. Bagaimanakah status pengoperasian sekolah apabila berlaku perubahan fasa PPN?

Jika sesebuah negeri beralih ke fasa seterusnya, pengoperasian sekolah adalah mengikut ketetapan fasa baharu yang akan dilaksanakan selepas dua (2) minggu daripada tarikh peralihan ke fasa tersebut.

21. Apakah tindakan pihak sekolah sekiranya terdapat kes positif COVID-19 apabila sekolah dibuka?

Sekolah memaklumkan kepada Pusat Kesihatan Daerah (PKD) dan melaporkan dalam sistem aplikasi data COVID-19. PKD akan membuat penilaian risiko bagi menentukan tindakan seterusnya.

B. PEMBUKAAN SEMULA SEKOLAH DALAM NEGERI FASA 2 PPN

22. Murid manakah yang perlu hadir apabila sekolah dalam negeri Fasa 2 PPN dibuka?

Murid yang akan hadir tanpa penggiliran adalah seperti berikut:

a. Sekolah Rendah

- Murid Berkeperluan Khas (MBK) di Sekolah Kebangsaan Pendidikan Khas (SKPK) dan Program Pendidikan Khas Integrasi (PPKI).

- b. Sekolah Menengah
 - i. murid Tingkatan 6 Semester 2, *International Baccalaureate Diploma Programme* (IBDP) Tahun 2 dan Program Prauniversiti Semester 3 Sekolah Sukan Malaysia;
 - ii. MBK di SMKPK/Sekolah Menengah Pendidikan Khas Vokasional (SMPKV) dan PPKI; dan
 - iii. murid kelas peperiksaan antarabangsa iaitu IGCSE *O-Level, A-Level, Australia Higher School Certificate* dan IBDP di sekolah antarabangsa.

23. Adakah MBK di Program Pendidikan Inklusif (PPI) juga hadir ke sekolah dalam Fasa 2 PPN?

Tidak. MBK di PPI hadir ke sekolah mengikut ketetapan sebagaimana murid di kelas aliran perdana.

24. Adakah murid dan guru dibenarkan merentas negeri untuk hadir ke sekolah?

Ya. Surat pengesahan akan dikeluarkan oleh pihak sekolah bagi membolehkan murid dan guru merentas negeri.

C. PEMBUKAAN SEMULA SEKOLAH DALAM NEGERI FASA 3 PPN

25. Murid manakah yang akan hadir ke sekolah dalam negeri Fasa 3 PPN apabila sekolah dibuka?

Murid akan hadir seperti berikut:

1. Tanpa penggiliran
 - a. Sekolah Rendah
 - i. MBK di SKPK dan PPKI; dan
 - ii. murid prasekolah/tadika swasta.
 - b. Sekolah Menengah
 - i. Tingkatan 6 Semester 2, IBDP Tahun 2 dan Program Prauniversiti Sekolah Sukan Malaysia;
 - ii. MBK di SMKPK/SMPKV dan MBK di PPKI;
 - iii. murid kelas peperiksaan antarabangsa bagi IGCSE *O-Level*, *A-Level*, *Australia Higher School Certificate* dan IBDP di sekolah antarabangsa; dan
 - iv. murid Prauniversiti Sekolah Sukan Malaysia dan murid kelas peperiksaan awam di sekolah asrama sepenuhnya.
2. Secara penggiliran
 - i. murid kelas peperiksaan antarabangsa selain IGCSE *O-Level*, *A-Level*, *Australia Higher School Certificate* dan IBDP yang ditetapkan oleh KPM di sekolah antarabangsa dan sekolah ekspatriat; dan
 - ii. murid kelas peperiksaan awam di sekolah harian/swasta.

D. PEMBUKAAN SEMULA SEKOLAH DALAM NEGERI FASA 4 PPN

26. Adakah kehadiran murid ke sekolah secara serentak dalam Fasa 4 PPN?

Kehadiran murid ke sekolah secara berperingkat adalah seperti berikut:

A. Bagi sekolah di negeri Kumpulan A pada 3 Oktober 2021 dan 4 Oktober 2021 di negeri Kumpulan B

1. Tanpa penggiliran
 - a. Sekolah Rendah
 - i. murid prasekolah/tadika swasta; dan
 - ii. MBK di SKPK dan PPKI.
 - b. Sekolah Menengah
 - i. murid Tingkatan 6 Semester 2, IBDP Tahun 2 dan murid Prauniversiti Sekolah Sukan Malaysia;
 - ii. MBK di SMKPK/SMPKV dan PPKI;
 - iii. murid kelas peperiksaan awam di sekolah asrama sepenuhnya; dan
 - iv. murid kelas peperiksaan antarabangsa bagi IGCSE *O-Level*, *A-Level*, *Australia Higher School Certificate* dan IBDP di sekolah antarabangsa.

2. Secara penggiliran
 - a. Sekolah Menengah
 - i. murid kelas peperiksaan antarabangsa selain IGCSE *O-Level*, *A-Level*, *Australia Higher School Certificate* dan IBDP yang ditetapkan oleh KPM di sekolah antarabangsa dan sekolah ekspatriat; dan
 - ii. murid kelas peperiksaan awam di sekolah harian/swasta.

B. Bagi sekolah di negeri Kumpulan A pada 17 Oktober 2021 dan 18 Oktober 2021 di negeri Kumpulan B

1. Tanpa penggiliran
 - a. Sekolah Rendah
 - i. murid prasekolah/tadika swasta; dan
 - ii. MBK di SKPK dan PPKI.
 - b. Sekolah Menengah
 - i. murid Tingkatan 6 Semester 2, IBDP Tahun 2 dan murid Prauniversiti Sekolah Sukan Malaysia;
 - ii. MBK di SMKPK/SMPKV dan PPKI;
 - iii. murid kelas peperiksaan antarabangsa bagi IGCSE *O-Level*, *A-Level*, *Australia Higher School Certificate* dan IBDP di sekolah antarabangsa; dan
 - iv. murid kelas peperiksaan awam, Tingkatan 3 dan 4 di sekolah asrama sepenuhnya.

2. Secara penggiliran
 - a. Sekolah Rendah
 - Murid Tahap 1 (Tahun 1, 2 dan 3).
 - b. Sekolah Menengah
 - i. murid kelas peperiksaan antarabangsa selain IGCSE *O-Level*, *A-Level*, *Australia Higher School Certificate* dan IBDP yang ditetapkan oleh KPM di sekolah antarabangsa dan sekolah ekspatriat; dan
 - ii. murid kelas peperiksaan awam, Tingkatan 3 dan 4 di sekolah harian/swasta.

C. Bagi sekolah di negeri Kumpulan A pada 31 Oktober 2021 dan 1 November 2021 di negeri Kumpulan B

1. Tanpa penggiliran
 - a. Sekolah Rendah
 - i. murid prasekolah/tadika swasta; dan
 - ii. MBK di SKPK dan PPKI.
 - b. Sekolah Menengah
 - i. murid kelas peperiksaan Tingkatan 6 Semester 2, murid IBDP Tahun 2 dan murid Prauniversiti Sekolah Sukan Malaysia;
 - ii. MBK di SMKPK/SMPKV dan PPKI;
 - iii. murid sekolah asrama sepenuhnya; dan
 - iv. murid kelas peperiksaan antarabangsa bagi IGCSE *O-Level*, *A-Level*, *Australia Higher School Certificate* dan IBDP di sekolah antarabangsa.

2. Secara penggiliran
 - a. Sekolah Rendah
 - i. murid Tahap 1 (Tahun 1, 2 dan 3); dan
 - ii. murid Tahap 2 (Tahun 4, 5 dan 6).
 - b. Sekolah Menengah
 - Murid lain termasuk murid sekolah swasta, sekolah antarabangsa dan sekolah ekspatriat.

27. Bagaimanakah pelaksanaan pembukaan semula sekolah di kawasan gelembung pelancongan (travel bubble) seperti di Pulau Langkawi?

KPM menetapkan sekolah dalam kawasan gelembung pelancongan akan beroperasi mengikut Fasa 4 PPN.

D. PELAKSANAAN UJIAN KENDIRI COVID-19

28. Adakah murid yang bergejala atau menjadi kontak rapat kepada pesakit COVID-19 semasa berada di sekolah/asrama perlu menjalani ujian sendiri?

Ya.

29. Bagaimanakah kaedah pelaksanaan Ujian Kendiri COVID-19 bagi murid asrama sepenuhnya?

Ujian Kendiri COVID-19 dilaksanakan tiga (3) kali, iaitu semasa murid kembali ke asrama, hari ke-6 dan hari ke-14 berada di asrama.

30. Adakah KPM akan membiayai kos Kit Ujian Kendiri COVID-19 bagi murid yang akan pulang ke asrama sepenuhnya?

Ya.

E. PENGURUSAN PRASARANA

31. Adakah murid dibenarkan makan di kantin sekolah?

Tidak. Semua murid makan di dalam kelas masing-masing semasa waktu rehat dengan seliaan guru. Bagi kelas yang menggunakan penyaman udara, murid makan di ruang terbuka dengan seliaan guru.

32. Adakah penyaman udara boleh digunakan?

Ya. Penyaman udara boleh digunakan pada tahap minimum dan penggunaan kipas angin adalah digalakkan.

33. Adakah langsir, *skirting* meja, tikar dan permaidani boleh digunakan di bilik darjah?

Tidak.

F. PENGOPERASIAN MURID DI ASRAMA

34. Adakah murid akan kembali ke asrama apabila sekolah dibuka?

Ya, secara berperingkat mengikut fasa PPN dan mematuhi SOP yang ditetapkan oleh KPM.

35. Adakah murid yang tinggal di negeri Fasa 1 dibenarkan pulang ke asrama yang berada di negeri Fasa 2, Fasa 3 atau Fasa 4 PPN?

Ya. Surat pengesahan akan dikeluarkan oleh pihak sekolah bagi membolehkan murid merentas negeri.

36. Adakah murid yang belum divaksin dibenarkan pulang ke asrama?

Ya.

37. Bagaimanakah pergerakan murid pulang ke asrama?

Murid dibenarkan pulang ke asrama secara berperingkat seperti berikut:

- a. dihantar oleh ibu bapa/penjaga;
- b. menaiki kenderaan yang disediakan oleh pihak sekolah;
- c. menggunakan pengangkutan udara atau air; atau
- d. menggunakan kenderaan sendiri (hanya untuk murid Tingkatan 6 dan murid diploma KV).

38. Bagaimanakah pembelajaran murid yang ibu bapanya enggan menghantar anak/anak jagaan pulang ke sekolah/asrama?

Guru akan memaklumkan topik pembelajaran dan memberi tugas kepada murid melalui kaedah yang bersesuaian.

39. Adakah murid dibenarkan pulang bermalam?

Tidak.

40. Adakah murid dibenarkan membawa telefon bimbit ke asrama?

Ya. Sekolah perlu menyediakan garis panduan penggunaan telefon bimbit.

41. Adakah ibu bapa/penjaga boleh datang melawat anak/anak jagaan di asrama pada hujung minggu?

Tidak.

42. Adakah langsir di bilik asrama dibenarkan?

Sekiranya penggunaan langsir tidak dapat dielakkan, ia mestilah tidak menghalang pengudaraan dan pencahayaan.

43. Adakah penghadang fabrik perlu dipasang pada katil dua (2) tingkat?

Tidak.

44. Adakah murid diwajibkan memakai pelitup muka semasa berada di asrama?

Tidak. Walau bagaimanapun, pemakaian pelitup muka di asrama adalah digalakkan.

45. Adakah aktiviti riadah dibenarkan bagi murid di asrama?

Ya, walau bagaimanapun, aktiviti hanya boleh dilaksanakan secara individu dengan penjarakan fizikal sekurang-kurangnya 1 hingga 3 meter dan dijalankan di kawasan terbuka serta mematuhi SOP yang ditetapkan.

G. PENGAJARAN DAN PEMBELAJARAN (PdP)

46. Adakah jadual waktu sedia ada boleh digunakan apabila sekolah dibuka semula?

Ya. Sekolah juga boleh menyesuaikan jadual waktu jika ada keperluan.

47. Bagaimanakah pembelajaran murid yang hadir secara penggiliran?

Murid yang hadir secara bergilir akan mengikuti PdP di sekolah untuk tempoh seminggu dan Pengajaran dan Pembelajaran di Rumah (PdPR) secara sendiri pada minggu berikutnya. Guru akan menyediakan tugas untuk PdPR murid tersebut.

48. Adakah murid yang belum dijadualkan untuk hadir ke sekolah perlu meneruskan PdPR?

Ya. PdPR diteruskan dengan bimbingan guru berdasarkan Manual Pengajaran dan Pembelajaran di Rumah Versi 2.

49. Adakah mata pelajaran Pendidikan Jasmani Dan Pendidikan Kesihatan (PJPK) dibenarkan apabila sekolah dibuka semula?

Ya. Murid hendaklah berpakaian sukan dari rumah.

50. Adakah aktiviti sukan dan kokurikulum bersemuka dibenarkan apabila murid hadir untuk PdP di sekolah?

Tidak.

51. Adakah pelaksanaan ujian SEGAK secara bersemuka dibenarkan apabila sekolah dibuka semula?

Ya, untuk murid kelas peperiksaan sahaja.

52. Adakah kelas tambahan boleh dilaksanakan apabila sekolah dibuka semula?

Tidak. Pemakluman mengenai perkara ini akan dibuat oleh KPM.

H. PENGOPERASIAN KOLEJ VOKASIONAL (KV)

53. Bilakah tarikh kemasukan bagi murid KV?

Kemasukan murid KV untuk PdP secara bersemuka adalah seperti berikut:

- a. murid Diploma Vokasional Malaysia (DVM) semester 1 dan semester 3 bagi negeri Kumpulan A bermula dari 3 hingga 28 Oktober 2021, manakala bagi negeri Kumpulan B bermula dari 4 hingga 29 Oktober 2021;
- b. murid Sijil Vokasional Malaysia (SVM) semester 3 dan Sijil Kemahiran Malaysia (SKM) bagi negeri Kumpulan A bermula dari 31 Oktober hingga 18 November 2021, manakala bagi negeri Kumpulan B bermula dari 1 hingga 19 November 2021; dan
- c. murid SVM semester 1 bagi negeri Kumpulan A bermula dari 21 November hingga 10 Disember 2021, manakala bagi negeri Kumpulan B bermula dari 22 November hingga 11 Disember 2021.

54. Bagaimanakah pengajian bagi murid yang tidak bersemuka?

Pengajian yang tidak bersemuka akan meneruskan pembelajaran secara PdPR yang berfokuskan kepada pengukuhan kemahiran amali melalui bahan pembelajaran berasaskan simulasi mengikut garis panduan yang telah dikeluarkan.

55. Bilakah kemasukan murid Sistem Latihan Dual Nasional (SLDN) ke industri?

Murid Sijil Kemahiran Malaysia (SKM) yang menggunakan kaedah SLDN akan memulakan pengajian pada 28 Oktober 2021 bagi negeri Kumpulan A dan pada 29 Oktober 2021 bagi negeri Kumpulan B, tertakluk kepada kebenaran pembukaan industri dalam Fasa PPN di negeri tersebut.

56. Bagaimanakah pelaksanaan pentaksiran amali bagi murid KV di peringkat pengajian diploma?

Pentaksiran Berterusan Khas (PBKhas) akan dilaksanakan berdasarkan takwim pengajian dan garis panduan yang dikeluarkan oleh KPM.

57. Bagaimanakah pelaksanaan pentaksiran amali bagi murid KV di peringkat Sijil Vokasional Malaysia (SVM)?

Pentaksiran SVM akan dilaksanakan mengikut jadual dan kaedah pentaksiran yang ditetapkan oleh Lembaga Peperiksaan.

58. Bagaimanakah cara murid KV menduduki Peperiksaan Berterusan Khas (PBKhas) Teori dan Amali di peringkat pengajian diploma sekiranya mereka tidak dapat pulang ke KV?

Ibu bapa/penjaga perlu memaklumkan kepada pihak KV. Pelaksanaan PBKhas akan dilaksanakan mengikut garis panduan yang dikeluarkan.

I. INSTITUSI PENDIDIKAN SWASTA (IPS)

59. Adakah tadika swasta di negeri dalam Fasa 1 dan Fasa 2 PPN dibenarkan beroperasi bagi anak yang ibu bapa/penjaga bekerja?

Ya. Ketetapan pengoperasian ini turut terpakai kepada:

- a. tadika di sekolah swasta;
- b. tadika swasta di sekolah antarabangsa; dan
- c. tadika swasta di sekolah ekspatriat serta pusat perkembangan minda untuk murid berumur 4 hingga 6 tahun.

60. Bilakah tarikh pengoperasian secara bersemuka bagi IPS kategori pusat?

Pengoperasian secara bersemuka bagi IPS kategori pusat hanya dibenarkan di negeri dalam Fasa 3 dan Fasa 4 mengikut ketetapan berikut:

- a. Fasa 3: kehadiran adalah 50 peratus daripada kapasiti kelas; dan
- b. Fasa 4:
 - i. Peringkat 1: 3/4 Oktober 2021 – kehadiran adalah 50 peratus daripada kapasiti kelas;
 - ii. Peringkat 2: 17/18 Oktober 2021 – kehadiran adalah 70 peratus daripada kapasiti kelas; dan
 - iii. Peringkat 3: 31 Oktober/1 November 2021 – kehadiran penuh mengikut kapasiti kelas dengan penjarakan fizikal.

61. Adakah pelanjutan sesi persekolahan tahun 2021 hingga Februari 2022 terpakai kepada semua sekolah swasta?

Tidak. Hanya sekolah swasta yang melaksanakan Kurikulum Kebangsaan disarankan untuk mengikut pelanjutan sesi persekolahan yang digunakan di sekolah kerajaan.

62. Adakah sekolah swasta dengan enrolmen kurang daripada 150 orang boleh hadir bersemuka sepenuhnya?

Tidak.

63. Adakah ketetapan had kehadiran 50 peratus bagi kehadiran bersemuka dengan penggiliran dalam Fasa 3 dan Fasa 4 terpakai kepada sekolah swasta?

Ya.

64. Adakah sekolah antarabangsa boleh melaksanakan penilaian antarabangsa seperti *Primary Checkpoint* dan *Secondary Checkpoint* secara bersemuka?

Ya, melibatkan sekolah antarabangsa dalam Fasa 4 sahaja.

65. Adakah murid peperiksaan di sekolah swasta dan sekolah antarabangsa yang menyediakan kemudahan asrama boleh hadir bersemuka tanpa penggiliran?

Ya, hanya bagi sekolah yang menyediakan kemudahan asrama untuk semua murid dan tertakluk kepada SOP yang ditetapkan oleh KPM.

66. Adakah KPM akan mengeluarkan senarai peperiksaan antarabangsa lain yang dibenarkan untuk murid hadir bersemuka secara penggiliran?

Ya, KPM akan mengeluarkan pemakluman senarai peperiksaan antarabangsa yang dibenarkan kepada sekolah antarabangsa dan sekolah ekspatriat yang terlibat dalam masa terdekat.

67. Apakah tindakan yang perlu diambil sekiranya terdapat murid, warga atau pekerja IPS yang bergejala semasa di IPS?

Pihak IPS hendaklah mengambil tindakan segera seperti berikut:

- a. mengasingkan murid, warga atau pekerja IPS yang bergejala sementara menunggu untuk mendapatkan rawatan serta memberi pelitup muka untuk dipakai;
- b. melaksanakan Ujian Kendiri COVID-19 dengan pembiayaan sendiri;
- c. menghubungi dan mendapatkan nasihat Pejabat Kesihatan Daerah (PKD) untuk tindakan selanjutnya; dan
- d. memaklumkan kepada ahli keluarga keadaan murid, warga atau pekerja IPS tersebut.

68. Adakah kemudahan di IPS untuk aktiviti sukan dan kokurikulum seperti kolam renang, dewan serbaguna dan gelanggang permainan boleh digunakan oleh pihak luar semasa fasa PPN?

Tidak.

J. PENGOPERASIAN INSTITUT PENDIDIKAN GURU (IPG)

69. Bilakah murid IPG dikehendaki pulang ke kampus?

Murid kembali ke kampus di negeri Fasa 3 dan 4 PPN secara berperingkat bermula 7 November 2021 bagi IPG di negeri Kumpulan A dan 8 November 2021 bagi negeri Kumpulan B.

70. Adakah murid IPG dibenarkan merentas negeri untuk kembali ke kampus?

Ya. Surat kebenaran khas akan dikeluarkan oleh IPG kepada murid bagi membolehkan mereka merentas negeri untuk kembali ke kampus. Namun, kebenaran adalah tertakluk kepada murid yang telah menerima vaksin lengkap.

71. Adakah pensyarah IPG dibenarkan merentas negeri untuk hadir bertugas?

Ya. Surat kebenaran khas akan dikeluarkan oleh IPG kepada pensyarah bagi membolehkan mereka merentas negeri untuk hadir bertugas.

72. Adakah pensyarah yang belum menerima vaksin lengkap atau belum divaksin perlu hadir ke IPG?

Ya. Walau bagaimanapun, mereka tidak dibenarkan mengajar secara bersemuka dengan murid. Mereka akan melaksanakan tugas yang ditetapkan oleh ketua jabatan mengikut SOP yang ditetapkan.

73. Adakah semua pihak pengurusan dan Anggota Kumpulan Pelaksana (AKP) belum menerima vaksin lengkap atau belum divaksin perlu hadir ke IPG?

Ya. Mereka akan melaksanakan tugas yang ditetapkan oleh ketua jabatan dengan mematuhi SOP yang ditetapkan.

74. Adakah murid IPG yang telah menerima vaksin lengkap boleh memilih untuk meneruskan PdP dalam talian di rumah?

Ya. Murid perlu memaklumkan kepada IPG mengenai perkara ini. Walau bagaimanapun, murid digalakkan untuk hadir ke kampus.

75. Bagaimanakah praktikum dan *internship* bagi murid IPG?

Praktikum dan *internship* IPG akan dilaksanakan mengikut pengoperasian sekolah dalam fasa PPN.

76. Bagaimanakah pelaksanaan PdP apabila sebahagian murid IPG berada di kampus manakala sebahagian lagi berada di rumah?

PdP dilaksanakan secara hibrid.

77. Bagaimanakah pelaksanaan aktiviti sukan, kokurikulum dan riadah serta Bina Insan Guru (BIG) di IPG?

Pelaksanaan aktiviti sukan, kokurikulum dan riadah serta BIG adalah mengikut arahan Majlis Keselamatan Negara (MKN) serta tertakluk kepada Prosedur Operasi Standard (SOP) Am Sektor Sukan dan Rekreasi yang dikeluarkan oleh Kementerian Belia dan Sukan (KBS) yang sedang berkuat kuasa mengikut fasa PPN di IPG tersebut.

78. Adakah murid IPG dibenarkan keluar (outing) atau pulang bermalam?

Tidak.

79. Adakah ibu bapa/penjaga dibenarkan melawat murid IPG yang tinggal di asrama?

Tidak.

K. PENGOPERASIAN KOLEJ MATRIKULASI (KM)

80. Adakah KM akan dibuka dalam fasa Pelan Pemulihan Negara (PPN)?

KM akan dibuka mengikut fasa PPN seperti berikut:

- a. Semua kolej dalam negeri Fasa 1 dan 2 tidak dibuka; dan
- b. Semua kolej dalam negeri Fasa 3 dan 4 akan dibuka. Kolej di negeri Kumpulan A akan dibuka pada 17 Oktober 2021 dan kolej di negeri Kumpulan B akan dibuka pada 18 Oktober 2021.

81. Adakah murid KM dibenarkan merentas negeri untuk kembali ke kolej?

Ya. Surat kebenaran khas akan dikeluarkan oleh pihak kolej kepada murid yang sihat, tidak bergejala dan telah menerima dos lengkap vaksin.

82. Adakah murid KM yang belum menerima vaksin lengkap boleh memilih untuk meneruskan PdP dalam talian di rumah?

Ya.

83. Adakah murid KM dalam Fasa 3 dan Fasa 4 PPN boleh memohon untuk tidak kembali ke kolej atas faktor keselamatan?

Ya. Ibu bapa/penjaga murid perlu mengemukakan permohonan secara bertulis kepada Pengarah KM.

84. Bagaimanakah pelaksanaan PdP di KM?

Pelaksanaan PdP di KM adalah seperti berikut:

- a. Fasa 1 dan 2: Semua murid mengikuti PdP secara PdPR;
- b. Fasa 3: Murid Sistem Dua Semester (SDS) dan Sistem Empat Semester (SES) 3 mengikuti PdP di kolej/PdPR manakala Murid SES 1 mengikuti PdPR; dan
- c. Fasa 4: Murid SDS dan SES 3 mengikuti PdP di kolej manakala Murid SES 1 mengikuti PdP di kolej/PdPR.

85. Bagaimanakah pelaksanaan pentaksiran di KM?

Pelaksanaan pentaksiran di KM adalah seperti berikut:

- a. Fasa 1 dan 2: secara dalam talian; dan
- b. Fasa 3 dan 4: secara bersemuka/dalam talian.

86. Adakah murid KM dibenarkan keluar (outing) atau pulang bermalam?

Tidak.

87. Adakah ibu bapa/penjaga dibenarkan melawat murid KM yang tinggal di asrama?

Tidak.

88. Adakah semua pihak pengurusan dan Anggota Kumpulan Pelaksana (AKP) belum menerima vaksin lengkap atau belum divaksin perlu hadir ke KM?

Ya. Mereka akan melaksanakan tugas yang ditetapkan oleh ketua jabatan dengan mematuhi SOP yang ditetapkan.

89. Adakah pensyarah yang belum menerima vaksin lengkap perlu hadir ke KM?

Ya. Pensyarah perlu hadir mengikut kehadiran murid bagi kelas yang diajar. Pensyarah ini akan ditempatkan dalam bilik yang berasingan dan tidak dibenarkan berinteraksi dengan murid serta pensyarah lain.

90. Bagaimanakah pelaksanaan aktiviti sukan, kokurikulum dan riadah di KM?

Pelaksanaan aktiviti sukan, kokurikulum dan riadah adalah mengikut arahan Majlis Keselamatan Negara (MKN) serta tertakluk kepada Prosedur Operasi Standard (SOP) Am Sektor Sukan dan Rekreasi yang dikeluarkan oleh Kementerian Belia dan Sukan (KBS) yang sedang berkuat kuasa mengikut Fasa PPN di KM tersebut.

-TAMAT-